


02 FEBROARY2025 NY NANOLORANA NY TOMPO



Ankehitriny, ryTompo, vaoalefanao ampiadananaarakanyteninaonympanomponao,fanymasokonahitanyfamonje naavyaminao

Ry Kristianina havana, raha ny marina dia alahady faha-4 mandavantaona anio nefa noho izy mifanindry amin'ny 02 febroary ankalazantsika ny nanolorana ny Tompo tao an-tempoly izay antsointsika hoe fetin'ny Jiro masina dia ny 2 febroary no ankalazaintsika. Isaorantsika Andriamanitra satria manampy antsika tokoa amin'izao fiarahan-dia ataontsika Mpivahinin'ny Fanantenana, amin'izao taon-jobelin'ny famonjena izao ny fibanjinantsika ny 2 febroary. Manasa antsika hanaraka ny litorjia fa tena fampianarana mikasika ny maha-mpivahiny antsika antsoina hitondra fahazavana dia I Kristy eo anivon'izao tontolo izao.

Fanamasinana ny jiro masina no anombohana azy ety ivelan'ny Eglizy mialoha ny fankalazana ny Eokaristia. Mampahatsiaro ny fidirana tamin'ny Varavarana Masina, nefa tsara ny manamarika ary efa averintsika matetika fa tsy manao "théâtre" na fampisehoana isika raha manao izany fihetsika izany fa manatanteraka litorjia izany hoe asan'Andriamanitra ka mivelona izay ankalazaintsika isika. Tsy hoe mahatsiaro fotsiny manko isika fa noho ny asan'ny FANAHY MASINA ao amintsika dia sady mankalaza no mahatsiaro isika ka mivelona an'izay ankalazaina.

Vakitenyl : **Malakia 3,1-4.**

Tononkira : Sal. 24

Heb 2, 14618

Evanjely : **Lioka 2,22-40.**

Androany dia mahatsiaro ny nanolorana ny Tompo tao an-tempoly isika, raha ny marina kokoa dia Izy no nanolotra ny tenany, Izy ilay fahazavana ka izany no mahatonga antsika androany maneho an'izany amin'ny alalan'ny fitondrana ny jiro miditra ao an-deglizy.

Tsara ny manao fampianarana fohifohy ny anton'izao fankalazana izao : Araka ny fampianarana ao amin'ny lalàn'I Moizy ao amin'ny Levitika12,4 : rehefa avy miteraka zazalahy **ny** reny iray dia midio mandritra ny **33** andro ka tsy mahazo miseho sy miditra any an-toerana

masina mandritra io fotoana io. Izany hoe manao confinement. Raha manisa isika dia izao andro izao ny fahataperan'ny andro fidiovan'i Maria taorian'ny niterahany an'i Jesoa araka ny lalànan'i Moizy lazaintsika io.

Fanolorana ny Tompo tao an-tempoly noho Izy zanaka lahy voalohan-teraka talagnolo hoy isika ka atao hoe masina ho an'ny Tompo (*Eksaody* 13,12-15) : ho fahatsiarovana ny nanafahan'Andriamanitra ny vahoakan'Israely nandevozina tany Ejipta ka nandripahana ny lahimatoa rehetra tao amin'ny Ejipsianina, na olona izany na biby fa namonjena kosa ny zanak'Israely, ny voalohan-teraka amin'ny biby dia tsy maintsy vonoina atolotra ho an'ny Tompo, ny voalohan-teraka amin'ny olona kosa dia tsy vonoina fa avotana ka soloina biby : araka ny Evanjely teo dia voromailala na domohina roa no natolotra.

Ampahatsiahivina izany satria ao anatin'ny taon-jobilin'ny famonjena. Tanteraka ao amin'i Jesoa ny famonjena voalazan'ny Testamenta Taloha sy izay fanafahana rehetra.

Fetin'ny jiro masina, ny fahazavàna : i Kristy no « fahazavàna hanilo ny jentily » araka ny tenin'i Simeôna. Famantarana fotsiny araka izany ny jiro, eny fa na ampiasaintsika amin-javatra maro ka andraisana fitahiana noho ny finoana ananantsika aza, fa Izy Jesoa mihitsy no fahazavàna ilaintsika.

Andron'ireo nanokan-tena amin'ny fomba manokana hiaina ny fahalavorariam-pitiavana araka ny soritan'ny Evanjely (Mt 19,25) ihany koa. Andro natokana ho an'ny relijiozy, izay miezaka hitovy amin' i Jesoa natolotra ny Ray, manamasina ny tenany ho an'ny Tompo sy ho an'ny olombelona ka zary « fahazavana » manilo ny manodidina noho ny fanehoam-pitiavana tsy misy fetra ary tsy misy efitrefitra iainany.

Isika koa avy nandray ny fahazavan'i Kristy tamin'ny Batemy ka voatokana ho an'ny Tompo dia zary fahazavana eo anivon'ny mpiara-belona. Mahatonga antsika ihany koa hanilo ny hafa tahaka an'i Kristy izay natolotra tao an-tempoly. Izany no mahatonga antsika ho EOV MISIONERA VITA BATEMY KA IRAHINA ZARY TABERNAKLA VELONA.

Henontsika i Simeona milaza ao amin'ny evanjely fa izy Kristy no fahazavana ka izay mandray azy dia lasa fahazavana tokoa saingy zary fanafintohinana kosa ho an'izay tsy mandray azy. Ambarany amintsika ny tena dikan'izao zavatra ankalazaintsika izao. Rehefa nahita maso an'i Jesoa sy nitroto azy teo an-tanany i Simeona dia nilaza fa io ilay fahazavana hanilo ny olona rehetra sady voninahitr'Andriamanitra : *"Ary nitso-drano azy ireo i Simeôna, ka nilaza tamin'i Maria Renin'ny Zaza hoe: "Indro ity Zaza ity no voatendry ho fandavoana sy ho fananganana ny maro amin'i Israely ary ho famantarana hotoherina, — ary ny fanahinao aza hotanterahin-tsabatra — mba hiseho ny hevitra ny fo maro"*

Izany no ankalazaintsika androany 02 febroary dia i Jesoa manilo an'izao rehetra izao. Io no mahatonga antsika mamerimberina fa tsy maintsy i Kristy no hanana ny teny farany. Mazava koa fa tsy hanaiky izany ny Ratsy ka hanao izay hanapotehina ny fahazavana dia hitantsika izany amin'izao krizy maro lafy iainantsika izao.

Fampianarana lehibe ho antsika ihany koa ny fahafahan'i Simeona sy Ana afaka nandray ny fahazavana satria olona mivavaka izy ireo, olona miray fo tanteraka amin'Andriamanitra, tao amin'izy ireo ny Fanahy Masina ka afaka nandray an'i Jesoa ka nahita ny fahazavana izy ireo.

Ry Kristianina havana, tsy afaka handray ilay fahazavana isika raha tsy ny fontsika no miova,

raha mbola "encombré" araka ny averimberintsika matetika. Mila fiovam-penitra mahery vaika isika raha te hanao départ vaovao marina. Raha mbola ao anatin'ny fontsika ao ny fialonana, ny adiady, ny fitiavan-tena, ny fihatsaram-belatsihy, raha ao anatintsika ao ny harena tsy izy satria ny harena tokana dia Andriamanitra, feno ny fontsika ka tsy misy toerana ho an'i Jesoa intsony, maizina isika ka tsy afaka handray azy.

Hanampy antsika hanao discernement ny fanatanterahantsika ny Sinaody faha-7 fa indrindra izao fijanonana faha-3 hanampy izao, handray an'I Jesoa toa an'I Simona sy Ana ka hitondra Azy eo amin'ny fiainana hahitantsika ny fivelarana ny mahaolona sy olon-drehetra ka zary fahazavana ho an'ny rehetra. Izany no ataon'ny Mpivahinin'ny Fanantenana mamafy hafaliana, fiadanana, fihavanana sady kristianina no malagasy manasitrana an'izao tontolo izao izay maratra tokoa.

Amin'izao fankalazana an'i Jesoa natolotra ao an-tempoly izao, ny marina kokoa dia izy nanolotra ny tenany amin'ny maha-Andriamanitra azy mba ho fahazavana ho antsika olombelona. I Jesoa dia olombelona feno tanteraka tokoa noho izy nanaiky ireo lalàna mametraka azy amin'ny maha-olombelona azy satria araky ny lalan'i Moizy dia tsy maintsy atolotra ao an-tempoly ny zaza voalohany rehetra. Nanaiky an'izany izy, io no manambara fa olombelona izy ary ny maha-olombelona azy no nentiny namonjeny antsika. Nanaiky ho fahotana izy izay tsy mpanota mba hanafaka antsika amin'ny fahotana ka izany no fahazavana. Raha mandray azy isika dia afaka handeha amin'ny fahazavana. Izany no ambaran'ny vakiteny voalohany ao amin'ny bokin'i Malakia mpaminany : *"tonga ao an-tempoly ny Tompo tadiavinareo"*. Tanteraka ao amin'ny fiainantsika izany hafatra izany satria isika no tempolin'Andriamanitra, isika no Eglizy. Raha isika àry no mahatsapa fa Eglizy tokoa dia afaka mitondra an'ilay fahazavana eo amin'ny manodidina antsika izay ambaran'ny mpanoratra ny taratasy ho an'ny Hebrio : *"tsy maintsy mitovy amin'ny rahalahiny amin'ny zavatra rehetra izy, hamonjeny ireo rahalahiny"*. Nanaiky ho tonga olombelona i Jesoa mba ho fanilo sy fahazavana ary izany no fanavotana ho antsika. Raha miditra amin'ny fiainantsika tokoa i Jesoa dia hanavao ny fiainantsika izy ka hanavao ny fianakaviansika, ny fiaraha-monina misy antsika, ny tontolo manodidina antsika. Izany no tsy maintsy hanaovantsika "nouveau départ". Azo lazaina fa "nouveau départ" ihany koa ny zava-niseho tao an-Tempoly tamin'iny fotoana iny. Izany rehetra izany no fototr'izao taon-jobily izao ka handraisantsika ny famonjena ary faritan'ny teny finoana ao amin'ny fiakem-pinoana tany Niceé, 1700 taona lasa izay. Tena taom-pahasoavana tokoa ity taona ity ho antsika.

Araka ny fantantsika dia nofidin'i Papa Md Jaony Paoly 2 ho andron' ny Voatokana androany, nofidiny izany mba hahafahana mivavaka ho azy ireo manokana sy handinihan'izy ireo koa fa famantaram-pitiavana izy ireo satria io fitiavana io no tena fahazavana. Matoa i Jesoa manolotena dia satria ao anatiny ny fitiavana , izy no fitiavana.

Manolotra ny tenany koa ireo Voatokana natokana ho an'Andriamanitra tahaka an'i Jesoa mba ho famantarana ny fahazavana amin'ny alalan'ny fiainany manontolo fa nahafoy ho an'Andriamanitra izy ireo ka mahafoy, manompo ny olombelona. Maro ny zavatra mifamahofaho ka mila manana mason-tsivana isika fa indrindra ireo voatokana mba hahita sy hivelona marina ny vôkasiony araka ny vavaka ataontsika : Omeo relijiozy vonona sy mahafoy tena ny Eglizinao, ho vavolombelon'ny Fitiavanao, hatrany amin'ny faravazan-tany.

Ry Kristianina havana amin'izao taona Masina izao, amin'izao taon-jobilin'ny famonjena izao dia aoka hivavaka isika ho an'ny fianakaviana eglizy kely mba haka tahaka ny Fianakaviana Masina nanolotra an'I Jesoa tao an-Tempoly , mba samy vonona hanolotra ny tenantsika amin'Andriamanitra hahatonga antsika ho fahazavana amin'ireo manodidina antsika.

Mitodika manokana amintsika ray amandreny mangataka batemy aho. Mbola zazakely i Jesoa no natolotr'i Maria sy Jôsefa tany an-Tempoly, toy izany koa no ataonareo ray aman-dreny rehetra mitondra ny zanakareo atao Batemy. Adidy aman'andraikitra lehibe tsy maintsy tanterahina izany. Aoka tsy fombafomba fotsiny no anaovantsika azy na dia efa zava-dehibe fa aoka ny finoana velona no hitondranareo ny zanakareo atao batemy. Hitantsika eto fa tsy vitan'ny nanolotra fotsiny i Josefa sy Maria fa nanabe azy anatin'ny tontolo mikolokolo izay fifandraisana amin'Andriamanitra. Tadidintsika fa lazain'ny Evanjely fa isan-taona no mandeha manao pelerinajy any Jerosalema izy ireo . Adidinareo ray amandreny no mitondra ny zanakareo mivavaka. Mila tontolo mikolokolo ny fifandraisana ny zanatsika raha tiantsika hanana fivelarana marina.

Raha ny tena marina, dia tsy hoe natolotra ihany i Jesoa fa azo lazaina hoe efa nanolo-tena ihany koa. Ny fiainany manontolo taty aoriana no manamarina izany. Amin izao fankalazana izao àry dia andeha isika mianakavy efa vory saina, tanora sy efa lehibe, hanolotra ny fiainantsika manontolo amin Andriamanitra. Marina fa anio dia Andro maneran-tany ivavahana ho an'ireo ao anatin'ny Mpanokan-tena manokana; fa na izany aza dia isika vita Batemy rehetra mihitsy no efa natokan'Andriamanitra ho Azy, ary antsoina hatrany hanokan-tena sy hanolo-tena ho Azy sy ho an'ny namana. Ny hoe Kristianina araka ny efa fantatsika dia avy amin'i Kristy. Aoka àry isika hivelona izany anarana izany tahaka an'i Simeona sy Ana nandray an'I Kristy an-kafaliana ary nanolotra azy. Mandray Azy no ataontsika amin'ny Eokaristia, Izy no fahazavana, isika koa manolotra ny tenantsika, manome ny tenantsika, izay midika fa mahafoy sy manompo an'ireo manodidina antsika, izany ny fiainan'ny Voatokana. Noho ny Batemy hoy isika dia voatokana isika ka zary EOY MISIONERA VITA BATEMY KA IRAHINA ZARY TABERNAKLA VELONA izany hoe tsy maintsy manana fiainana eokaristika isika vonona mahafoy, manompo anatin'ny fahamarinana.

Ry Kristianina havana, aoka mba hivelona bebe kokoa an'izao andro lehibe izao isika, andron'ny jiro masina, antoky ny fahazavana dia i Kristy. Isika no jiro masina eo amin'ny mpiara-belona amintsika, hitondra ny fahamarinan'i Kristy isika, hampanjaka ny rariny sy hitsiny ao amin'i Kristy sy amin'ny alalany ary miaraka Aminy, hivelona ny fitiavan'i Kristy ka ho mpampihavana isika amin'ny ataontsika rehetra. Izany no ivelomantsika ity Taon-jobilin'ny famonjena ity izay hahatonga antsika ho Mpivahinin'ny Fanantenana mpamafy hafaliana, fiadanana, fihavanana sady kristianina no malagasy eo anivon'izao tontolo izao mangetaheta famonjena. Aoka samy hikatoka isika amin'izao Sinaody faha-7 izao ka hiroso lalindalina kokoa hatrany samy vonona miara-mivavaka mandalim-pinoana miaro, mikolokolo ny zava-boary. Hiezaka hamboly hazo sy hiaro ny tontolo manodidina antsika mba hanambarana fa famantaram-pamonjena tokoa ny fiainantsika manontolo. Masina Maria, Md Josefa mivavahà ho an'ny fianakaviana mba ho tena eglizy kely tokoa mandray an'I Jesoa sy mitondra azy ho Fahazavana ny rehetra miatrika izao krizy maro lafy izao. Amen

Mompera Arseveka Mgr Benjamin Ramaroson